



UNIVERSITÄTS-
BIBLIOTHEK
PADERBORN

Universitätsbibliothek Paderborn

Widder die kelch Diebe

Bugenhagen, Johannes

Wittemberg, 1532

VD16 B 9473

Nüchtern zum Sacrament gehen.

urn:nbn:de:hbz:466:1-34042

Die weil es nicht zu dieser sache gehöret/magstu lesen in
meinem buche/aus den dreien Ordnungen etc.

Also sehet jr nu/ jr lieben Pfaffen/das die Aposteln
in der Tauffe nichts gewandelt haben/von dem/ das in
Christus befohlen hatte/ das jr nicht aus einem solchen
Exempel dürfft vrsache suchen zu verbieten/den Leyen
den Kelch/vnd die leute darüber zu morden. Die Apo-
stel haben das Euangelion gepredigt/darauff Teufften
sie/Ir verfolget solch Apostolisch Euangelion/vnd seid
mörder.

Nüchtern zum Sacrament gehen.

Item/zum andern bringen die Kelchdiebe noch eine
Historien herfur vnd sprechen/ Das kan ja niemand ver-
neinen/das Christus seinen Jüngern das Sacrament ha-
be gegeben/da sie nu im Abendmal gegessen hatten/ daß
sie assen ja zuvor das Jüdische Osterlam/Vnd hat doch
gleichwol hernach die Kirche solchs gewandelt/ vnd da-
gegen verordenet vnd angenommen/ das man nüchtern
zum Sacrament sol gehen/vnangesehen/ das Christus
das widerspiel gehalten hat/vnd denen das Sacrament
gegebē/die nicht nüchtern warē. Die Corinthen/ wie Pau-
lus schreibet/ habē es auch nicht nüchtern empfangē. Nu
gleich wie die heilige Kirche hie gewandelt hat die wei-
se Christi/ vnd ist doch darüber kein hader worden/Ja
die Lutherischē haltens auch also/ Also mag die heilige
Kirche (die mutwilligen Pfaffen) die weise vom Kelche
auch wandeln/vñ verbieten den leyen den selbigen zune-
men/vnangesehen/das es Christus geboten/vñ die ersten
Christen also gehalten haben.

Antwort/ Dis stück vnd das ander droben gesaget/
Nemlich/ das ein lebendiger leib on blut nicht sey/ist im
Concilio Constantiensi zum scheine/ on schrift vnd an-

S bere

bere vrsachen/ schlechts alleine furgewendet / vnd gar
nichts anders/wie du lesen magst im Concilio / sessione
decima tertia. Vñ vmb solche losen blinden teidingen wil
len haben sie alda verboten den Leyen den Kelch/ wider
der Göttlichen Maieestet Christus befehl / für welcher
doch himel vnd erde erbieben solten/ Vnd haben auch al
da geboten/ das man die menschen darüber morden solt/
die Christum ehren wollen inn seinem befehl/ vnd nicht
achten solche Kinder teidingen vnd mutwillige Tyrans
ney.

Man saget/ das zu Costniz/ da das Concilium ge
halten ward/ ein verstendiger man an die Kirchthüre ge
schrieben hatte solche wort/ Spiritus sanctus Concilio
Salutem/ Curate negotium vestrum/ vt possitis/ nos ali
js rebus occupati nunc/ vobis adesse non possumus/ Va
lete. Alda sind geleerte leute gewesen/ die das vnrecht wol
gemercket haben/ Aber gewalt gieng vber recht. So mus
es gehen durch Gottes gerichte/ wenn vns Gott straffen
wil/ wie wirs denn auch wol verdienen. Ach Got himeli
scher vater sey gnedig vñ gedencf nicht vnser vndancf bar
keit/ vnd bezale deinen feinden iren mutwillen/ wie du
angefangen hast/ zu erretten deine armen gefangenen/
Amen. Superbia eorum/ qui te oderunt/ ascendit semper.

Wolan / wir wollen zur sachen greiffen/ Ich habe
meine tage inn so grosser sachen nicht grössern mutwillen
gespürt/ wie inn diesem stücke. Ich meine/ der Teuffel sey
selbs da Abt gewesen/ Christus hat vns im letzten Abent
mal sein Sacrament befohlen vñ geboten/ Nemet/ esset/
Trincket alle draus/ Solchs thut zu meinem gedechtnis/
bis zum Jüngsten tag/ wie Paulus saget. Er hat vns ni
cht befohlen oder geboten/ Nemet das Sacrament nach
der malzeit/ Er hats vns auch nicht verboten vnd gesa
get/ Ir solt das Sacrament nicht nemen nach der mal
zeit/

zeit/sondern er hats frey gelassen/Aber vom Kelche hat
er warlich befohlen/ das die Christen trincken sollen zu
seinem gedechtnis/ vnd glauben das sie alda trincken sein
wares blut. Wenn du nu das Sacrament nüchtern oder
vnnüchtern empfehest/ so thustu nichts widder Christus
befehl/ denn er hat nichts dauon befohlen.

Wie wol ich straffen wolt einen/ der aus eim mut-
willen/ on redliche vrsache wolt thun/ widder diese löbli-
che gewonheit der Christē/ die nüchtern zum Sacrament
gehen/ zum ergernis der andern/ Denn solche gewonheit
geschicht nicht on vrsache/ wie es auch scheint aus der
Epistel Pauli an die Corinthen. Widerumb wil ich auch
nicht vom Sacrament bleiben/ wenn ich eine Muschat
odder der gleichen etwas gessen habe/odder getruncken/
wie denn etliche vnuerstendige Pfaffen sich gefurchtet
haben/ vnd in selbs vnd ander leuten daruber gewissen
gemacht haben/ on not/ Denn es ist ja nicht die meinung
der rechten Christen/ das sie aus löblicher gewonheit vn-
altem gebrauch/ stricke machen wollen/ damit sie die ge-
wissen gefangen nemen/ Es were doch ja nichts anders/
denn ein irrig gewissen/ wenn ich vmb einer Muschaten
willen/ die mir Christus wedder geboten noch verboten
hat/ nicht solt zum Sacrament gehen/ das mir Christus
befohlen hat/ wenn ich sonst lust dazu hette/ vnd wolt da-
zu gehen.

Aber wenn du zum Sacrament gehest/ vnd wilt den
Kelch des HEILIGEN nicht trincken/ so thustu widder
den befehl Christi/ vnd verachtest Christum selbs/ inn
seinem befehl/ vnd lesterst noch dazu/ vnd schilfst die für
Ketzer/ die den Kelch des HEILIGEN trincken wollen/
hastu ein gefallen an der Tyranney/ derer/ die die leu-
te darüber morden/ so ist denn deine sache noch erger.

Die Pfaffen im Concilio Constantiensi odder sonst

S ij jnn

inn irer lügen lere/ dürfen selbs nicht sagen/ das Chri-
stus das Sacrament befohlen habe/ nüchtern odder vn-
nüchtern zu essen/ noch füret sie der Teuffel/ das sie on
vernunft aus der groben Etselköpfen Dialecticen be-
schliessen also/ Die Aposteln nemen das Sacrament ni-
cht nüchtern/ vnd wird doch nu nüchtern genomen/ Dar-
umb wollen wir macht haben/ den Leyen den Kelch zu-
verbieten/ vnd die leute darüber zu ermorden/ Das ist
schendlich widder Christum gehandelt/ denn das eine
hat er frey gelassen vnd kein wort dauon gesagt/ das an-
der hat er mit seinem Göttlichen worte befohlen/ dawid-
der leret der heilig geist nicht/ auch kein fromer Christ
wissentlich/ auch kein Engel aus dem himel/ sondern
der geist des Antichristi leret vnd mordet dawidder mit
den tolln Psaffen/ vnd mit dem Teuffel selbs/ wel-
cher ein lügner ist mit falscher lere/ vnd ein mörder/ wenn
man die falsche lere nicht leiden wil/ Joh. 8. wie er sich
denn nu zu vnsern gezeiten auch offentlich beweiset wider
das Euangelion Christi.

Wir suchen inn dieser sachen nichts anders/ wie wir
denn auch nichts anders suchen sollen/ denn das wir ar-
me sunder dem befehl Christi vom Sacrament mügen
gehorsam sein/ welcher befehl on sünde nicht kan verach-
tet/ viel weniger verboten werden. Die Psaffen aber brin-
gen vns für vnützliche sachen/ damit sie vns die ding/
die nötig befohlen sind/ nemen wollen vnd verbieten/ ja
auch darüber morden/ Ex liberis faciunt necessaria/ vt
que vere necessaria sunt/ nobis auferant/ contra Christi
mandatum/ dicentis/ Quod potuit mutari mutatum est/
ergo quod non potest mutari/ mutabimus/ et mandabi-
mus contra mandatum Dei.

Also thun im nu auch etliche Sacramentschender/
wenn sie sehe/ das der gemein man mercket/ das sie leren
wider

wider die offentliche wort des befehls Christi/ so bevelen
sie sich auff's aller höchsten/ das sie mügen verblenden
die simpeln leute/ mit andern worten/ (die das Sacra-
ment von Christo befohlen/ nicht sonderlich angehen)
vnd lauffen das wilde hundert die wunderburg mit iren
schwarmköpfen also/ das du dich verwundern müssest/
vnd thun gleich/ als die phanatici spiritus/ wie rechte
fliegende Teuffel/ das du nicht wissen kanst/ wosie hin
wollen/ Izt sind sie im Mose/ igt im newen Testament/
igt im Propheten/ odder auch im den Historien/ igt im
Apocalipsi/ vnd suchen allerwegen/ das sie mügen bewei-
sen/ das wir nicht essen den waren leib/ vnd trincken das
ware blut Christi im Sacrament/ Vnd dürffen noch wol
fragen daneben/ Wo ist denn alhie har vnd haut/ fleisch
vnd beine? Vnd dürffen auch wol widder herumfaren/
vnd sagen/ Das wir es nicht recht halten mit dem Sa-
cramente/ wenn wir die liechte anstecken/ vnd ziehen die
Kaseln an/ haben nicht einen hülzern tisch/ vnd sitzen
nicht zu tische/ als Christus sas/ Daraus wollen sie be-
schliessen ire Opinion. Ergo/ Christus leib vnd blut wird
nicht empfangen im Sacrament. Das kömpt eben so wol
dazu/ wie die kne zur windmülen. Darnach furet sie der
Teuffel auch im himel/ das sie sagen/ Christus sitzt
zu der rechten Gottes/ darumb kan er vns nicht seinen
leib vnd blut im Sacrament geben/ wenn er auch gleich
saget/ Das ist mein leib etc.

Lieben Papisten vnd lieben Sacramentschender/
wie seid jr doch beide sampt so feindlich gram dem Göt-
lichen befehl Christi vom Sacrament? Ir suchet
uber die gangen Biblien/ das jr nicht finden künd/ vnd
verderbet ewren kopff mit eiteln schwermgedanken/
oder mit Christus befehl/ dran doch die ganze sache ge-
legen ist/ wöllet jr euch nicht beissen. Trotz euch auch als
S ij len beiden/

len beiden/das jr das thun dürfft/jr sollet allesampt dar
über zuschanden werden/vnd Christus befehl sol mit al
len ehren bestehen. Verbum Domini manet in eternum.

Du must also ferne von einander scheiden inn dieser
vnd inn allen andern sachen/was Christus frey gelassen
hat/vnd kein wort davon befohlen/vnd was er geboten
vnd mit klaren Worten seiner Christenheit befohlen hat.
Das sind aber verzweimelte buben/die Christus befehl
können in den wind schlagen/vnd suchen aus der schrift
spöttische schützreden/dadurch sie andere leute auch mü
gen verführen. Also haben die Pfaffen gethan inn Conci
lio Constantiensi/Also thet Bossensis inn Engelland/
Also thet Doctor Septiceps zu Dresden etc. Der eine
nimmt die Kunst von dem andern/wider die warheit/vnd
wil doch gleich wol nicht helfen. Bossensis non videtur
errare/ sed Diabolo traditus esse/ quia vir optimus scri
bit manifestas calumnias contra verbum Christi/et con
tra suam (vt videtur) conscientiam/ Horrendum est im
pugnare veritatem agnitam etc.

Was nu frey ist/vñ von Christo vns nicht mit einem
Worte sonderlich befohlen/als das Sacrament nüchtern
odder vnnüchtern empfangen/vnd der gleichen/das sol
vns inn vnsern gewissen auch frey sein/vnd darinne mag
man ordiniren/was nützlich odder ehrbarlich/vnd vns
zur sachen dienstlich ist/so ferne/als nicht ist wider Got
tes wort/vnd den Christlichen glauben/Was aber Chri
stus vns befohlen hat/als den Kelch/das kan vns nie
mand mit rechte verbieten/sondern wir sind schuldig bey
verlust der seligkeit/solchen befehl nicht zu verach
ten.

Diese meinung leret Paulus klar/1 Corinth. 11. da er
saget/ Cetera cum venero disponam/das ist/Das ander
wil ich ordnen/wenn ich kome. Diesen spruch misgebrau
chen

chen auch die groben Eselköpffe/ Man solt sie zuvor inn
die Schule jagen/ehe sie bücher schrieben/das sie lerne-
ten/was Cetera hiesse. Cetera mus ja alda heissen/die
andere ding/ davon noch nicht Paulus gesagt hat/Er
meinet ja nicht/das er in damit den Kelch wil verbieten/
von welchem verbot kein Apostel/kein Christ/ auch keine
Doctores Ecclesie gewußt haben/ bis zu diesen letzten
vnd fehrlichen gezeiten/Vnd Paulus schreibet/das er es
vom **HERRN** selbs empfangen habe/ was er vom
Kelche des **HERRN** geschriben hat/Sondern seine mei-
nung ist/als wolt er sagen/Was ich vom Sacrament ge-
schriben/vnd euch zuvor geleret habe/das habe ich vom
HERRN Christo empfangen/darumb mus es also blei-
ben. Cetera/ die andere ding/ davon nicht gesagt ist/die
sonst keinen sonderlichen befehl vnd gebot haben/vom
HERRN/wil ich ordnen/wenn ich kome. Inn den dingen/
die inn vnser gewalt sind/ da sehe man zu/ das alles ör-
dentlich zugehe/1. Corinth.14. Christus befehl aber wil
vnnuerendert sein.

Solche meinung bekennet der Babst auch selbst inn
der sachen/ davon wir nu handeln/de Consecra.Dist.2.
Liquido/ welche vnser blinde Doctores wedder hören
noch wissen wollen/vnd sind wort Augustini ad Ianna-
rium/vnd lauten also/Wenn Christus vermanet hette/
das man das Sacrament nach der andern speiße stets
solte nemen/so glenbe ich/das solche weise niemand hette
gewandelt etc.Lieber Augustine/das glenbe ich auch/
der Babst bekents auch/Aber vnser Papisten halten wi-
der Gottes wort/ noch die Doctores/nach des Babsts
Recht/wo es dienet zu irer pracht vnd dem Bauche.

Wo bleibet nu der Esel künst/damit sie sagen/Ist
das auff komen/ das man nüchtern das Sacrament
kimpet/ so wollen wir auch recht haben zu vnserm Kelch/
den

den zu verbieten/ Ist eins verendert/warumb solt man
auch nicht das andere verendern? Non est simile frater.
Zum ersten/ist an Christus befehl nichts verendert/ denn
Christus hat nicht befohlen/ das Sacrament nüchtern
oder vnnüchtern zu nemen/ wie es denn am tage ist/ vnd
das geistliche Recht daselbs/ aus den worten Augustini/
bekennet. Im andern wird öffentlich widder Christus
befehl gehandelt vnd wird gebraucht eine mörderische Ty-
ranney widder die leute/die Gotte gehorsam sein. Siehe
stu noch nicht/wie sich die widerchristliche lere flicke.
Sie haben nichts für sich/ire büberey wil nicht mehr fe-
ste halten.

Der Aposteln Concilium.

Item/Zum dritten bringē sie aus der Historien Act.
15. Das die Aposteln vnd Eltesten vnd brüder von Jeru-
salem schrieben den heidē/die da waren Christen wordē/
das sie sich solten halten von dem Opffer der Abgötter/
Des misbraucheten etliche/ wie zumor gesagt ist aus der
Episteln Pauli. 1. Corinth. 10. Vnd von der hurerey/die
etliche/so aus den heiden bekant warē/nicht achteten für
sunde/ wenn sie nur keinen Ehebruch theten/ Vnd vom
versticktem/ vnd vom blute/ vmb der schwachglaubigen
Jüden willen/ die noch zum teil hiengen an Mose/der
solche speise verboten hatte.

Durch das erste wurden die schwachglaubigen hei-
den verführet/ das ander war widder Gottes gebot/das
doch etliche nicht meineten. Durch das dritte wurden die
schwachglaubigen Jüden geergert/ vñ kundten nicht sein
bey denen/die solche speise assen/in grawet das für. Dar-
umb vermaneten nicht alleine die Aposteln/ sondern die
ganze Jüdische Christenheit/ wie da geschrieben stehet/
das solche sunde vnd ergernis solten vermieden werden/
darüber